

23 AUG 1997

Mahathir-Komanwel (Dengan gambar)

MAHATHIR TINJAU PERSIAPAN KOMPLEKS SUKAN NEGARA

KUALA LUMPUR, 23 Ogos (Bernama) -- Perdana Menteri Datuk Seri Dr Mahathir Mohamad hari ini melawat Kompleks Sukan Negara dan perkampungan Sukan Komanwel yang sedang rancang dibina di Bukit Jalil di sini.

Dr Mahathir diberi taklimat oleh pegawai-pegawai United Engineers (UEM) Bhd, kontraktor turnkey yang dilantik bagi kerja-kerja pembinaan kompleks sukan itu yang merangkumi stadium terbuka, stadium tertutup, kompleks renang, infrastruktur luar dan perkampungan Sukan Komanwel.

Yang turut hadir Menteri Belia dan Sukan Tan Sri Muhyiddin Yassin, Pengerusi Eksekutif Sukom Ninety Eight Berhad Jen (B) Tan Sri Hashim Ali dan Pengerusi UEM, Tan Sri Radin Soenarno.

Kompleks itu akan dijadikan gelanggang utama pada temasya Sukan Komanwel ke-16 mulai 11 hingga 21 Sept tahun depan.

Stadium terbuka yang mempunyai 100,000 tempat duduk sudah 78 peratus siap. Ia akan mempunyai bumbung gantungan kabel, sembilan trek larian dan papan markah elektronik terkini, dan menyediakan 761 tempat duduk untuk wartawan dan ruang khas untuk 400 kerusi roda.

Pembinaan stadium terbuka sudah mencapai peringkat pembinaan trek dan padang, pemasangan tempat duduk serta kerja-kerja mekanikal dan elektrik di ruang bangunan sokongan.

Stadium tertutup pula yang mempunyai 13,000 tempat duduk kekal dan 3,000 tempat duduk mudah alih sudah 64 peratus siap dan ia akan berhawa dingin sepenuhnya.

Kompleks renang yang boleh memuatkan 4,000 penonton sudah 64 peratus siap.

Walaupun kontrak antara kerajaan dan UEM menetapkan tarikh siap pada 1 April bagi stadium tertutup dan kompleks renang, dan 1 Jun bagi stadium terbuka, UEM menjangkakan ia akan siap pada penghujung tahun ini.

Kerja pembinaan perkampungan Sukan Komanwel yang akan menempatkan lebih 6,000 atlet dan pegawai semasa temasya itu sudah siap 75 peratus. --

BERNAMA

AR AHH